

四庫全書

集部

欽定四庫全書

集部

方簡肅文集卷二

詳校官監察御史_臣曹坦

中書_臣劉源溥覆勘

總校官編修_臣王燕緒

校對官編修_臣沈清藻

謄錄監生_臣王宮

欽定四庫全書

集部六

方簡肅文集

別集類五

明

提要

臣等謹案方簡肅文集十卷明方良永撰良永字壽卿莆田人弘治庚戌進士官至右副都御史撫治鄖陽告歸再起巡撫應天於途疾作乞致仕旋除南京刑部尚書良永已先卒謚簡肅事迹具明史本傳是集為河南按

察使鄭茂所編隆慶庚午其孫山東布政使
攸續刊之良永當正德時厯任封疆皆著丰
采乞休後迂推屢及輒以養親辭今諸疏俱
在集中進退頗為不苟其文信筆揮灑雖不
刻意求工而和平坦易不事鉤棘視後來摹
擬塗飾之習轉為本色其論劾朱寧一疏慷
慨壯烈猶有牽裾折檻之風又嘗豫決寧王
宸濠反謀濠敗後貽書王守仁與論定亂大

計及其生平言學則云近世學者出天入神
超悟獨到專以心學為言皆附於象山其妄
如此即所為象山者似矣而中實未然毋亦
優孟之為孫叔敖歟其語皆隱刺守仁可謂
卓然不阿其所好者矣乾隆四十六年十月
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

方簡肅文集卷一

明 方良永 撰

奏疏

劾朱寧疏

浙江等處承宣布政使司左布政使臣方良永謹奏為
還民財以消民怨事臣待罪承宣自慚無補偶有所激
不忍緘默固知事涉權貴言出禍隨然竊計脂韋之罪

重於強聒而一身之患害輕於萬姓之荼毒故敢昧死
為陛下言之陛下亦知民者邦之本財者民之心乎又
知國家財賦盡出東南浙居其半乎故愛國必愛民愛
民必惜財而浙之民之財尤當愛以惜也陛下聰明天
縱豈不知此若曰我有大臣可付托也我有親臣可依
任也我罔敢知固有知之者矣臣則以為陛下有大臣
而不能有用有親臣而不肯為用雖謂之無臣可也陛下
環視左右最親且信與國同休戚者誰耶臣以為莫如

朱寧寧也出自賤氓甘為民養陛下一旦假以義子之
寵躋諸公侯之列勢傾中外富擬封君其親之也至矣
為寧者粉身碎骨以圖報稱尚不能萬分之一乃忍攫
取陛下之民財戕賊陛下之邦本以自速其不臣之罪
無是理也無而有之其愚耶病狂耶不然欺也陛下俯
聽臣言即甚愛寧必大怒也臣於正德九年十月初十
日到任即聞朱寧鬻鈔害人心甚惡之無何舊鎮守太
監劉璟語臣及三司曰寧堂鈔價意欲倍增何如臣茫

無以對細詢之先是分發十一府每鈔一塊易銀二兩傳報朱寧怪其太輕故欲增至四兩次日復語如初臣堅持不可璟離席立誓曰我受朝廷厚恩朝廷為我立感惠祠我豈不知此事貽害朝廷百姓哉顧勢不得不為耳我即不為他人必為百姓依然受害而我之禍立至矣言與泪俱至於邑不能自禁又次日復語如初竟增至三兩計鈔二萬一千九百九十六塊該銀三萬五千九百八十八兩臣退而思之有官守者不得其職則

去心雖憤激力不能拔亦失職也乃自劾求去迨此尸
素繼聞新有禁例勢豪鬻鈔害人者必罪臣竊喜此事
徐當中止故棲棲不去以待其變今既數月矣例格不
行而有司徵價急於星火或緣為奸倍而又倍椎膚剥
髓民不堪命天門萬里相與赴愬於監司監司欲言而
未果發民亦吞聲而不敢言輸價之吏絡繹於途矣新
鎮守太監王堂知民怨且作亦戚然不安乃出異辭謂
寧堂好人初不知鬻鈔之難如許苟豫知之必不為也

今業已為之可以已完二萬四千兩截解少慰其意前
頭太監既為之矣我不得不為之解二臣所稱寧堂指
朱寧也其勢熾之薰灼可知矣臣反覆思之方今四方
羣盜甫息瘡痍未瘳邊塞多虞饋餉或不時繼浙東西
諸郡自冬徂春雨雹為災蠶麥不利待哺之民嗷嗷千
里此何時也大司徒不能為陛下盡萬年長策以去京
師之冗食乃遣官四出坐索數十年之逋稅亦總功之
察也然豈得已哉冗食不可去而奇禍隨之矣臣故曰

陛下有大臣而不能用此猶可諉也劉璟王堂皆陛下
腹心之臣其在浙也皆有愛民之譽宜其却此無名橫
歛於談笑間直易易耳而二臣者徒能涕泣感額付之
無可奈何一則曰不得不為一則曰不得不解是亦豈
得已哉橫斂不可却而隱禍中之矣事勢若此苟猶隱
忍不為陛下言則已斂之財必入朱寧之手而民心傷
矣心傷則本傷本傷則枝幹凋瘁根柢蹶拔陛下其能
晏然於上乎是孰為孰使之哉陛下之義子亦陛下之

親臣也陛下反思及此能不寒心臣獨怪朱寧之忍於
負陛下也今人有一飯之恩必報陛下之待朱寧豈一
飯比哉不圖報則亦已矣反取陛下之邦本而動搖之
畧不顧惜此臣之所未喻也故跡其所為在子為不孝
在臣為不忠在法所必誅而無赦者也臣所謂陛下有
親臣而不為用者非耶然臣惟朱寧席寵以來陛下之
錫予無算四方之饋遺不貲篋笥之中必不少此又不
病狂喪心何忍為負恩之賊犯此必誅之刑意必真愚

而為人所使未可知也伏乞陛下割偏私之愛奮獨斷之勇廷詰朱寧以驚鈔害民之故如故愚不解事誤聽人言而請罪祈恩之不暇則削奪官爵薄示懲戒根究主使之人坐以重罪可也如其飾非護短不肯服辜是敢於欺罔也是不有陛下也陛下又何取而必欲子之乎下之詔獄明正典刑以昭示天下為臣子悖逆之戒可也斯二者惟陛下明察而果行之仍乞急勅都察院行巡按浙江監察御史會同鎮守三司等官將已欽鈔

價盡給還民未歛之數隨即停止并查究奸吏影射多
科侵剋之弊悉實諸法則民怨未甚猶可慰解邦本未
搖猶可培植陛下誠如是臣死且甘心其他利害固不
遑恤也陛下如以臣言為不然置之不問日復一日尾
大不掉將必蠶食天下肆無厭之求出於尋常所不料
者陛下於是時也悔之晚矣臣不勝激切痛憤之至為
此具本專差承差汪奎齋抱謹具奏聞伏候勅旨

浙藩乞休疏

浙江等處承宣布政使司左布政使臣方良永謹奏為
乞恩休致事臣見年五十四歲福建興化府莆田縣人
由弘治三年進士授刑部廣東司主事員外郎陞廣東
按察司僉事丁父憂起復為因不諳劉瑾捏寫旨意著
臣致仕正德五年瑾誅蒙起湖廣按察司副使陞廣西
按察使山東右布政使轉前職竊念臣本布衣蒙憲宗
純皇帝作養孝宗敬皇帝登用歷事陛下以有今日鞠
躬盡瘁死而後已臣職分所宜豈可言去緣臣有不可

不去者三臣母陳氏年踰七十景逼桑榆臣心思母心
逐雲飛母心思臣度日如歲此臣之情事迫切宜去一
也臣賦質薄弱近者跋涉兩廣侵冒風濕力疾上官實
欠精健若不速歸必為客鬼此臣之乖蹇宜去二也臣
素無學識小就攸宜乃今處此重地秋毫無補貽害地
方若不速歸恐妨賢路此臣之匪才宜去三也負三宜
去而不去是之謂不知耻以不知耻之人而竊陛下之
美官清議不容也伏乞察臣初心許臣休致使臣得申

烏鳥之情遂首丘之願免瘞曠之誚陛下之賜踰九鼎
矣臣雖歸老猶能歌咏聖德以答殊恩於不忘也臣無
任激切懇祈之至為此具本專差承差某齎抱謹具奏
聞伏候勅旨

按公自論奏朱寧之後即上疏乞休銓曹以公歷官
中外素負節操而是年朝覲又首膺旌典不允所請
後公又連上二疏乃得奉旨致仕今以其第一疏也
後二疏已散失俱存其略謹附錄于左以見公進退

出處之詳云後學鄭茂識

乞休第二疏

其畧曰臣蒙陛下付以旬宣重任畀以兩浙重地中夜以思謂左布政使之職上溥德意下需蒸黎其責也今臣備貲於浙幾一年矣甫寅而出盡酉而入不過錢穀簿書之煩非能為陛下宣布膏澤以蘇兩浙之困尸曠素官臣實恥之高位厚祿豈宜戀戀久居臣近為地方彈擊權貴政未知陛下何以處臣臣官不足惜倘從末

減先賜譴歸臣之心所至願也伏惟陛下垂察焉

乞休第三疏

其畧曰臣誤荷洪恩寵已云至更一轉移則上有褒封
可耀其前下有廕叙可庇其後寵且未涯是亦何負於
臣而臣乃汲汲求去若厭此寵榮然者豈性與人殊哉
誠有可言非敢立異臣之月俸柴薪俱已往支印信已
交參政周曾署掌自甘棄置不敢虛飾惟陛下垂憐俯
遂放歸田里不勝願幸之至

起用巡撫乞終養疏

致仕浙江布政使司左布政使臣方良永謹奏為乞恩
終養事臣原籍福建興化府莆田縣人見年六十一歲
由弘治三年進士授刑部廣東清吏司主事陞員外郎
廣東按察司僉事丁父憂起復為因不謁劉瑾矯旨著
致仕正德五年八月瑾以逆誅蒙起臣湖廣按察司副
使歷廣西按察使山東右布政使轉前職又因劾奏朱
寧驚鈔殃民尋乞致仕家居六年正德十六年恭逢陞

下入正大統寧以逆誅蒙聽言官交章論薦起臣都察院右副都御史提督撫治鄖陽等處地方勅諭至臣郊迎庭拜望闕謝恩祇受訖望輕恩重感極涕零竊念臣入仕三十二年實歷一十三年備嘗苦辛甘投閒散不謂遲暮之年親際聖明之會凡在臣工孰不忻幸勉圖自見臣有此遭逢正宜罄竭平生上答知遇朝拜命而夕啟行臣之分臣之心也緣臣實有大不得已者臣母陳氏年已八十精力衰耗卧病踰年足艱步履動須扶

掖使臣在官得聞母病猶思歸養況在母側親見病重
豈忍暫離進止憂惶莫知攸措輾轉圖惟殆廢寢食臣
惟忠孝一道君親一體時乎竭力於家與夫委身於國
惟其所當罔敢適莫如臣今日悃悞之懷則實有大不
得已者陛下寤寐求賢內外之臣忠純體國賢於臣數
等者何限舉以代臣則雖無臣亦不為少而臣得盡心
侍養以終母年苟於風化少有裨助亦臣報答之萬分
一也臣於大義若兩難臣之私心實獨苦伏望陛下俯

垂憐憫追寢成命勿以例拘容臣以原官終養別舉賢
能以充任使非獨遂微臣移忠之願亦大彰陛下勸孝
之仁臣幸甚臣母幸甚臣不勝懇切祈憐之至緣係乞
恩終養事理未敢擅便謹具本令義男方錫齋捧投進
伏候勅旨

再乞終養疏

致仕浙江等處承宣布政使司左布政使臣方良永謹
奏為懇乞天恩容令終養事臣於前疏已辭免今職祈

終母養然臣自受命以來日夜憂懼雖有忱辭猶慮阻格若候吏部查例上請不容陳乞移文到臣然後再疏則萬里往還留連歲月久虛地方重大之任愈增微臣違慢之愆是以冒昧再疏令原差義男並齎連上臣切念今日之事揆諸情義兩不可已臣母年已八旬身嬰痼疾桑榆之景理不可長臣雖有弟有子有姪可以代養然臣身為長子分義自重使臣仰體養命勉強即程或恐旬月之違遽成幽明之隔則臣之忍心不孝何所

於邇大節既虧平生喪盡將使宣和導利之時而有不得其所之物與賢彰德之具猥及無足為用之人是臣之出既無能全事母之情又無以完事君之節陛下何取焉此臣之所以甘冒斧鑕不辭煩黷甚非得已也伏乞陛下察臣之言哀憐其志普曲成之大德持獨斷之乾綱特出俞旨俯遂臣請臣與母幸甚若陛下必欲臣備使令不終棄之則臣年雖及耆力未衰憊正如李密所謂事陛下之日長也臣於此時必能勉策駑鈍不惜

馳驅以副奇遇以報鴻恩亦如諸葛孔明所謂鞠躬盡
瘁死而後已此臣犬馬惻怛由衷之至情也豈敢固飾
虛讓以上欺陛下哉臣臨疏不勝祈憐之至緣係懇乞
天恩容令終養事理未敢擅便謹具本仍授義男方錫
齋進伏候勅旨

繳勅疏

侍養都察院右副都御史臣方良永謹奏為齋繳勅諭
事頃蒙起用擢臣前職提督撫治鄖陽等處地方時因

母老連具二本奏乞終養該吏部題奉欽依方良永所
奏情詞迫切暫令在家侍養俟母病痊之日起用又該
兵部題奉聖旨方良永待有相應負缺用他欽此欽遵
移咨到臣不謂母子溫存重荷乾坤覆庇喜溢尋常報
乏絲綫為照前項地方既弗親臨所有原奉勅書應合
進繳慰私情於萬里已覃錫類之仁隆大孝於三宮益
篤惟親之教臣無任戴德欣躍之至謹具本並原勅齎
進以聞

辭月米疏

終養都察院右副都御史臣方良永謹奏為辭免恩賜
月米事本年五月十六日福建都司舍人寇定順齋到
吏部咨文一道為獎孤忠以勵臣節事該巡撫都御史
姚鏌奏吏部覆題臣居官素謹家無贏餘合照月給食
米事例量示優崇仍通行撫按所屬地方但有居官居
鄉節行可稱如臣之類者一體優禮等因節奉聖旨方
良永既居官素謹著有司月給米三石養贍欽此欽遵

移治到臣事出異常恩踰素望捫心內愧實不自安臣
惟月米者朝廷所以惠養老臣非累朝壽俊著有勲勞
特奉優詔者不得濫與臣歷塵仕路三十餘年未効涓
埃之報顧惟愚戇不能徇時再忤權奸奉身以退陛下
龍飛之初猥蒙起用臣以母老且病不忍輒離懇乞聖
慈容臣終養而又冒援恩詔得與見任官一體封贈榮
及三世陛下所以施於臣與臣所以受於陛下者皆云
過矣今復有茲月米之給尤出望外將以臣母老不得

祿養與則臣家雖貧猶能自給暮年甘旨供奉未缺稽
之舊典侍郎潘禮御史陳茂烈嘗有以給緣臣所處稍
異二臣以此懷慚不敢祇受伏乞追寢恩命將給臣養
贍月米移賚善人則錫予不濫足以示勸而臣亦得免
冒昧之戒矣為此具本專差義男方彙齎進謹具奏聞
伏候勅旨

謝月米疏

終養都察院右副都御史臣方良永謹奏為謝賜月米

事臣近具疏辭免月米蒙旨已有成命不准辭者臣叨
冒殊恩實慚非分感承德意惟切激中茲蓋伏遇皇帝
陛下聖由天縱道懋皇極治每先於率孝祿則重於勸
廉如臣迂庸亦荷優異顧為養方榮而母身不待徒感
傷於風木重頽汗於素餐撫枕自嗟拍天為証誓秉有
終之操及茲未死之年崇雅黜浮冀有成於大化補山
益海庶少竭於涓埃臣下情無任激切感荷之至謹具
本稱謝以聞

再起巡撫乞休疏

起用都察院右副都御史臣方良永謹奏為乞恩辭免
重任事正德十六年恭逢陛下御極蒙起臣前職撫治
鄖陽時以母老陳情蒙聖恩月給米三石養贍親終之
日有司具奏起用母沒之後臣已懇辭月米服闋之後
臣亦自甘棄置不謂聖明重此甄錄本年七月二十八
日欽奉勅總理糧儲兼巡撫應天等處地方竊念臣學
本愚陋性惟朴忠山林之日雖多廊廟之憂恒切況十

戴寸心曾無少盡而一家三世游受洪恩委身以報此
惟其時是以聞命遂行炎蒸不避已於八月初四日隨
帶家人二名兼程就道然臣志雖勤而福分素薄年未
耄而病骨漸衰八月二十四日行至浙江衢州府痰熱
交作晝夜弗寧荏苒自擁艱於前進夫畿輔重地也糧
儲大計也保釐之寄要在得人如臣羸劣何以堪此記
曰量而後入臣豈不自知哉不得已冒瀆宸聽乞賜垂
察許臣休致是終始成就臣使得以退為報矣臣不勝

願幸之至為此專差承差丁表民齋抱謹具奏聞伏候
勅旨

再乞休疏

起用都察院右副都御史臣方良永謹奏為懇乞天恩
辭免重任容令休致事臣自正德十年以布政使致仕
遭際陛下御極中間屢沐殊恩非只一事亦非只及臣
一身邇膺新命再召誓竭報稱顧犬馬微忱雖曰恒切
而蒲柳弱質望秋先零臣於八月二十四日到衢州府

地方距臣發莆之期甫二十日耳痰火上炎怔忡內作
恐妨重任上疏乞休而志念未灰猶欲為陛下剷除奸
弊少蘇東南凋瘵之民仰答洪造然後已舟次厭喧移
入古剎病卧旬餘痰火日盛飲食減而肌削精神耗而
心驚雖得該府給藥遣醫日來診視臣自度病勢非藥
力能降孤身客死無益不得已再瀝誠悃冒犯天威伏
乞察臣初心憫臣末路特發俞旨許臣休致亟選才識
老成委以保釐重寄貴臣悞事之愆遂臣首邱之願臣

一面與疾南還就醫以聽進止家鄉在望庶其有瘳臣
荷陛下覆載生成之恩至此即隕首捐軀何以為報哉
臣不勝慙懇祈憐之至為此具本專差承差柳集齋抱
謹具奏聞伏候勅旨

方簡肅文集卷一

欽定四庫全書

方簡肅文集卷二

明 方良永 撰

序

贈都憲鄭山齋公巡撫江西序

士之仕也有其具而已乎有其具無其時孔孟且需而弗進也剥盡而復否極而泰上有聖明下列壽俊內無疵政而外絕讐端夫是之謂時然際其會者蓋寡吾友

山齋鄭公之際亦奇哉當左轄江西時逆濠肆虐擊斷
無諱轉移大柄以死生禍福有位人其應如響公從容
其間屹不為變而媒孽之禍作以文致于罪卒落其官
而怒猶未解也林見素輟巡視費湖東辭相位去亦已
矣猶百計偵伺胡永清先幾而遁卒致詔獄遼左之戍
性命幾不保公既落官人猶公危雖公亦自危也迨反
狀既露逆兵猝起皖城扼其北陽明之旅已鼓行而西
濠進退無據駢首就擒當是時已有訟公之寃即其家

而起之者飛龍利見大命維新反弊政而還之舊以與
天下更始顧茲江西甫定之邦非老成宿望以拊循鎮
讐之不可而公巡撫之命下矣公之遭人固公竒公亦
自以為竒也故再起非難而時之遭際為難時猶濠時
也公固無此起濠死而中外之奸尚在公亦無此拜拜
亦無能久於其位今則無是矣簡修進良繩憚摧暴以
弘大新政保釐西人如書所謂不剛不柔詩所謂不吐
不如公固有以自副也抑善作者不必善成得於憂患

者恒失之安樂易曰樂則行之確乎其不可拔公孝友
貞諒廉而寡與論事侃侃不詭以狗文章刊落葩藻根
據理要無諛詞既得之涵養之素而履危歷險衡慮困
心八年之久以日見其至以晚其成於所謂不拔云者
非獨公之自信人亦信之無疑也由是而進之臺之省
以繫天下之重又何往而不可乎予不佞與公素莫逆
既慶公之遭且知公固不負此時也因書之以為行贈

贈大理丞黃後峰先生北上序

聖天子既登宸極首徵耆舊列於大僚莆以六卿起則有見素林公又亟錄先後忠諫罹害若干人復官晉秩卹亡有差莆以九卿起則有後峰諸君子後峰得禍最奇故酬之也特異吁其盛矣抑獨莆盛哉國家氣運於斯為盛莆有人以當之適遭其會耳雖然莆亦可畏也予耳目所及彭惠安公之響方震而見素嗣之見素方大震而後峰嗣之誰謂後峰發軔一疏其赫然震耀乃與二公均耶予嘗三復其疏矣首之以崇聖學繼之以

通言路正名號戒遊幸去小人終之以建儲貳凡六事
事為之防言無所隱指斥權奸如叱奴隸開陳利害不
諱死亡讀之使人毛竦骨寒悲憤生而痛哭繼之也竊
意憫時憂世之疏言之剴直痛切氣之勁奮激烈心之
至誠惻怛如後峰者不兩見也後峰自成進士時目擊
時事每憂懣不食入官以來日見奸雄勢盛即忿填胸
臆蚤夜弗寧嘗曰此輩何術輒能簸弄熒惑如此其甚
耶又曰吾不掃除此輩甘與共立於朝非夫也其至誠

惻怛蓄之久故其言直氣勁自與心謀如弩發機豈
容但已疏與蘭溪陸子汝亨同上陸亦心服之弗贊一
辭昔者箕子比干皆以諫顯孔子稱之於異代不曰忠
而曰仁容非以二子之自靖者同一至誠惻怛為仁乎
予因是而知至誠惻怛固人臣諫君之本也本之不立
始而為之終必悔外而彊之內必畏畏與悔諫之辱也
世不有以忠鯁入以回佞出者乎名之不可虛竊也如
是夫後峰性醇而行潔識遠而學優志之所嚮直以古

人自期而自視恒退然不露圭角為文厭雕刻而雋永有餘味其足以追步二公非直一疏之鏗鉤也勛名事業在他日者駸駸乎其宏以大自茲始矣大理檄至後峰謀諸素翁翁曰非常知遇不可不答也山齋曰平生抱負不可久鬱弗彰也予亦曰時哉弗可失也子行矣毋讓夫和聲鳴盛言非前日之言任重致遠固此氣也昌其言無餒其氣以自副其初心所至無前又烏知不有聞風而起踵吾之後者乎陸子之鄉有楓山章先生

者位尊望重而齒高孔子所謂仁人也維舟往謁必未語心孚而重有以相告也

贈陳敦賢給諫膺薦再起序

士君子立身之大節出與處也匪出處之為大不輕於出與處之為大也一偏一曲之士平時不灼見真知臨事輒依違遷就而乾沒不已果於忘世者又往往率意而任情其於出處且不知為何物無惑乎立乎其大者寥寥於天下也頃者奸宦怙寵竊弄威權欲逞彌天之

惡首猶士夫之口於是肆為殘刻賊害忠良流毒天下
中外之臣殞身於桎梏寃戍榜笞者非可一二數其幸
存者亦困踣顛頓朝不謀夕當是時也出乎處乎不待
智者能辨之矣然居其職嬰其禍則誼不可處必蚤見
必豫待必不徘徊顧戀而視富貴如浮雲夫然後可處
即處於大節也無負故夫痛憤激烈出危言以觸禍機
至亡身喪家有不暇恤者有見於不可處之誼也是與
阿媚悞巽盡棄平生曾不少愧者雖不可同年語要之

見幾而作又或一道也有臣癯然體不勝衣而燭事變
於未形棄美官而不惜雖使壯士莫敢齊驅吾耳目所
及敦賢一人而已間有能竝之者亦出一時之感發未
有炳於幾先而豫自裁決者也是果何道而得此哉平
生的乎有定見也臨事確乎有定力也不然出樊籠而
遊寥廓夫豈尋常尺寸者所能辦哉及乎奸官伏誅正
人嚮用再起之命簡在宸衷促行之檄繼出銓部君乃
幡然改圖不以終老林谷自甘而以乘時建立為急不

以前之處為足以自固而以今之出為得其本心是又暗合於古人憂違樂行之意信非偏曲之士所可擬也君之車馬有行色甫士夫家食者咸重君之出於是太學生林以正為請於大叅陳君待徵圖其意通守林公而下若干人詠其實而猥以序屬予予亦以迂疎觸諱幾蹈虎口而後處者視君之既明且哲政爾有愧予何敢序君哉雖然予於君同領鄉薦有廿餘年之雅茲又濫附薦書而起即不辱以正之請亦宜有言為君贈況

請之勤乎君今又一出矣履廢黜之艱者多懷顧忌幸
際會之易者或忘報稱君思前日所以廢我者為何今
日所以起我者為何其泛然耶固不足為重輕如以其
忠鯁廢而復以忠鯁起者君可不圖所以報稱而忍於
顧忌以自臭厥載耶夫保晚節之難與成大名均也君
而徒處猶無責也徒出焉人且議其後矣予嗣今將即
君之始而要君之終即君之已然而究君之未然君其
無以自負以負予為也此固諸士夫之所望也君始為

給諫多所建白出其餘力工詩文善畫有遠致茲人人能道之予不復贅

贈郡丞林以賢之官安慶序

林石渠子以賢初授郡丞也得江西之瑞有治績績又最於治盜未幾以憂去服闋改丞安慶安慶於古為皖為舒猶荒服於今為畿內則大郡也以畀以賢俾佐守以理人與地無兼得耶以賢取道歸掃松楸既來別予請所以為安慶予應之曰驟試子以未嘗試也固優輕

車熟路於郡丞也何有然不敢不有以告也逆瑾擅命
漁獵郡邑貪黠吏盜府庫以媚之不足又因以漁獵其
民網罟所施鷹犬所至富商鉅室無遺者瑾悅而已之
囊亦溢則揚揚焉坐待徙秩誰復為世道計加以兵荒
薦至官廩無終歲之儲數年來銖蓄寸累不能復其舊
之什一財之匱未有甚於此時者也為政者急所先不
此之務而簿領之役役即使精明炫赫亦無裨於緩急
況本之弊端則所謂銖蓄寸累者入私室耳為身謀耳

民且不信民之不信以在民上吾未見其能丞也以賢
避席曰祿也不敏向嘗領是教以治瑞而瑞治安慶當
江淮之衝非瑞比去留都不能千里固襟喉也萬一盜
起倉卒南北受敵勢必棘恐未可以瑞治治願有加也
曰地有僻要勢有難易治之道一也兵不足募可足士
不勇信賞可勇是果可以口舌文告為哉抑非獨藏富
於官安慶緒之軍圍睢陽也使城中公私皆有儲積必
不至以茶紙鼠雀代食愛妾可生城可恃以無恐然觀

巡遠之捐所愛如所憎而民亦信之弗去是豈瑣尾者
能辦哉城守具備為河北二十四郡之光顏平原可法
也夫以子之才當子之年又值此晏然無事之時其能
使安慶果安且慶也必矣無已安慶自有故事亦存乎
其人耳以賢再拜而去翼日鄉縉紳醵餞之於陳子玉
光之室使予主其席酒數行玉光作而言曰石渠子事
先生為高弟子茲行得無言耶予曰諾乃隳屣與語者
示玉光玉光曰此守責也稽戎籍之盈縮而取盈焉丞

之責塞矣何責石渠之備予曰丞守之貳丞之責詎止此耶此特當務之急耳於是王光亦然予言遂書為贈以賢之官序

贈考功劉紹功北上序

約齋劉紹功甫既免喪北上予姪重熙為乞贈言重姻誼也約齋與林石崖齊名於予輩行無論後先皆予畏也二君者能為古文辭馳騁軒輊不苟雷同尤淬礪行檢尚友古人石崖峭拔寡合約齋溫潤易親性殊而趨

一也意氣交孚實重予助今約齋行猶奪吾一臂即弗
為請予固將張之也約齋初授刑部主事以才望選入
吏部故刑法選法咸精無冤於有罪亦無冤於有德比
奔父喪復以適連持祖父母喪輶輶在疚者五閱歲人
情弗堪獨奉母治葬事又葬所未葬凡七喪旁及姑叔
母力不足貸以充人難之五年之內未嘗以衰經入公
門恥干人以私雷孟升侍御治莆時毀淫祠數百區鬻
以備賑約齋亦取其二稍有私議不知其為業師與舅

氏增立錐地官價自輸祠歸二貧士人又難之鄉長老
父行者視猶父祖行者祖視之敵已以下貧交者情慤
不改退自節抑人亦忘其為吏部宦家子弟隸僕類怙
侈張皇陵轆鄉社輕侮寒畯約齋羣從素醇謹衣食於
其家者長給薪水少供洒掃候門將命稍縱輒斥之人
不知其為吏部僕夫忠之移於君也自親始治之移於
官也自家始約齋事生死兩無負矣有君如此忍負之
乎恂恂乎無傲於鄉之人矣容肆焉以傲官長乎冒嫌

疑以恤乏飭臧獲毋怙寵矣有待下無恩馭吏弗嚴乎
抑非其至也寧忍貧弗屑枉已峙砥柱于頽波以大丈
夫之事也充而極之可以塵金玉銖軒冕獨請謁絕乎
哉向也歛其施修之於家今也起而攄之於天子之廷
晉而岳牧而卿佐又晉而宰執皆此道也予奚能增益
其所未至重熙曰規以輔之約齋之屬望也此頌也非
規也予以約齋入必復為吏部嚴畛域之限杜私覲之
門吏部故事也然則石崖之峭拔乎予將進之於是曰

約齋外和內剛此非所慮予惟文之垂遠必與道俱者也約齋能為古文辭予惟進之於道乎治其心養其氣融會乎宇宙古今推移恒變之妙體驗乎陰陽動靜開闔消息之機上達乎天地萬物生生化化之原渾涵浩博包括無遺操縱弛張惟意所適夫然後敷道之腴飾道之器駕唐軼漢挽先秦而上之予又奚能逆料其所至重熙曰是可以副約齋之望矣

贈郡守馮檢齋公入覲序

明年春正月適維外臣入覲之期吾郡守馮公行健以興化去京師八千里先數月戒行則今年七月也或止之曰公至郡七年矣年勞政望皆當大拜報旬月至矣盍少留弗往公曰吾慮不及此吾之欲往也意有大焉者夫人莫不欲覩所未嘗覩以為此生希濶竒逢今皇上入正大統即位一詔百姓鼓舞咸以為堯舜復生延頸跂足恨不咫尺闕庭以覲太平天子吾不煩介紹不假左右先容得平步赤墀仰瞻龍衮顧不欲往耶正人

畢起竒俊滿朝凝峻表儀巍然太平卿相彷彿乎夔契之再見欲履其堂階接其丰采聽其言論以自表見者衆矣弗往無由也更化以來敲朴弛放削罷民熙熙然俯仰足於事育而禮教興唐虞風動時雍之化可擬也吾往而經歷閩浙淮濟至止京畿目擊盛治宣為詩歌以形容太平氣象亦創見也吾於是惟不爭先覩之為快何憚一往而坐以待遷乎郡丞李君卿式等乃製錦為軸屬予贈言予謂公之意則然矣又惡知吾君吾相

聞公治郡之良不須其來以行陟明之典如漢虛丞相
位以待黃潁川賜郭荊州以三公之服者乎故事司府
官來朝吏部擇其治行卓異者秦旌之有大燕之錫寶
錙之頒而超擢繼之類數十年一舉難之也予濫與之
後已十年矣又惡知吾君吾相不因公至復舉行之乎
秉彛好德無間賤愚鳳凰芝草世間指而為瑞公之名
滿天下又烏知所歷所止之地不有輕萬戶侯而願見公
者乎則公茲往也誠所謂希濶竒逢不容自己者也

雖然公在則寮案有所依憑輓轡有所覆庇訟簡盜息而吏蠹不生愛公者固欲公之留也公既弗留遂捧檄而北余固知其不上下交慰不止也諸君曰是可以壯公行色故書

贈節推傅公擢倅常州序

是歲正德己卯夏六月擢吾郡推傅君美政通判常州府事報知民皇皇如失所依知不可留也謀立石道左以繫去思甫士大夫相率贈以言比十月部檄至君捧

之色若不懌然者松厓子訊之曰時不可為耶曰否大
懌初平聖心感悟更化善治此一機也奚為而不可無
亦負有資望而晉秩滯且悵耶曰否升沉遲速命也而
半刺端寮倅車分乘又得大郡如常亦足矣敢滯與悵
尤哉若是奚為其不懌也曰官易地而政未諳民或異
俗士夫或異向而心未易孚惴惴焉勛名損於作推時
是懌耳松厓子作而解之曰官信易矣而官政未始可
易也民俗信異士夫意向未必人人同而善善惡惡之

心未始不同也君嘗再蒞興一蒞杭杭之去常不數百里而近興之去杭不千里而近杭之民與其士夫君既能兼信之而無間於興今何獨疑於常襲君之故以無變于初常之人有不信耶予嘗見君褫身矣冰寒蘄苦一介非道義不以取又見君施於政矣峻法弛而惠愛溢察其隱而開其迷必小大不寬乃已又見君之與人矣遇以禮而接以誠事有弗直輒為理而或干以私則婉而拒之以是依依不忍舍士夫之樂於頌美也興與

杭既爾顧於常有弗爾邪而猶退焉若怯而惴惴焉以
為憂亦過矣君再拜謝曰微公言吾之鬱於中者將無
以自慰今釋然矣敢變其平生哉於是邑大夫雷君孟
升與三庠文學蔡君希淵輩製帛為軸來乞序文予
詞也拙無他說以張之乃次第所與君語者授之俾書
之為贈行序

送黃公悅之任合州學正序

予濫竽已酉鄉薦同榜之士凡三十三人每燕集聚晤

必以遠大相期祝三十三人者亦磊瑰奇特自負不少
蓋會合之情勝故愛助之誼周勤苦之志酬故直前之
氣壯勢則然也不數年間聲迹浮沉萍梗西東有幸而
獲選遂占朝籍者有偃蹇不售卒登鬼錄者有拘於格
例隨牒冷官而實非其志者頻叩之間令人感慨向之
所期漫不可考若予與郭君思修黃君公悅鄭君汝華
三四輩則相知自未遇時所責望許與者固皆相信於
平時非卒然相遇姑相標榜以矜詡誇大之云故窮通

好醜未易移易思修倡曰吾儕繼自今其母激母迂惟
時卷舒惟志母渝惟道之與俱予三人者從而和之遂
相與奉以周旋罔敢墜失庚戌癸丑予暨汝華繼登甲
榜官郎署思修亦領海陽學諭就職公悅獨挾其所有
以湏再舉了無彼此形迹之拘予時因壯之丙辰之春
公悅僅亦以合州學正去州去京師萬餘里學正職雖
清而寒氊斷簡兀兀窮年苟憚遠嗟卑誰肯樂就公悅
顧若遊近畿都顯仕然非其於出處之際訂之審慮之

周而惟時卷舒者能之乎公悅往矣於所謂志與道者
幸卒勉之常祿之供聊以自給商賈賄事請謁凡可以
污吾之所守者一切屏去旦夕立諸生堂下授以槩矧
課其勤惰必使施諸人實有諸已毋飾虛文應故事以
取譏誚則志立道行向之所期真無愧負矣公悅之祖
少叅公以名進士敷歷中外綽有聲稱百年喬木蔚乎
蒼蒼公悅方務培植灌溉以達其枝使過而息者莫不
躊躇瞻戀不忍舍去斯為克世其家又何假予言而後

興哉然箴規者朋友之責况予與公悅兼有姻戚之雅
誼固不得而終默也思修迫隔無緣相語汝華方以公
委督儲于通公悅朝發而夕至矣試以予言質之以為
何如

送徐元嘉掌教安仁序

師道立則善人多而朝廷正其職之所繫大而非細也
今天下士得預禮部試者往往白首以待甲科而恥於
為師儒至以相訾毀師儒之設其端使然哉官小則勢

輕祿薄則利微勢利移人雖賢者不能免使師儒下有
趨走之吏足張其威祿之所入者足以周族戚及孤嫠
則固樂而為矣抑其晨鐘暮鼓規規於訓詁文字之末
平時抱負鬱不得伸功名之士固亦不肯屑就亦匪專
為勢利拘也嗚呼是二者皆非也是皆可為世道慨也若
吾徐生元嘉其免於是也夫元嘉以宿學妙年屈第乙
榜授安仁學諭去衆咸惜之而元嘉獨欣然以喜其
言曰吾家徒四壁嚴侍見背今適有祿而不為慈親謀

是重吾不孝且吾非惡夫甲科而故為是矯飾也顧所
欲有大於此者即其言以觀其心勢利功名視如苓通
其與毛生之檄殆同趨向尋常尺寸之士未易窺也向
予家食時元嘉嘗從予遊予視其動容溫乎玉之在璞讀
其文辭沛乎水之東注間探其志則確乎不移直欲嚮
往以希諸古予時於儔衆中獨以孤鳳儼之今則果
符予言元嘉往矣藍輿迎致旦夕承歡其樂融融固將
界槐棘而輕彝鼎區區甲科之得失烏足重輕然宗族

稱孝於士為次元嘉止於斯而已乎因其所已至勉其所未至礪行檢以為身謀嚴桀黠以為門弟子謀即是
以悅乎親則甘旨之奉滫瀡之供非徒口體之養安仁
士風薰蒸鼓舞於感化之餘出而用世皆知所重非吾
元嘉伊誰啟之是則所謂善人多而朝廷正庶幾皆可
以無愧負不於師儒有光乎其或隨行逐隊漫無警省
徒竊祿養之名苟焉以玩愒歲月則猶夫人也於師儒乎
奚取吾固知元嘉必不為此矣今制凡師儒官六載教

有成績者許復赴禮部得與天下士角以元嘉之充
乎內而修乎外者起而應之必得甲科躋華要以展盡
其底蘊今日所就詎可為元嘉量哉孔子曰以孝事君
則忠予敢以是為元嘉異日祝

送林宗盛分教宿松序

興兩庠文士歲應貢來京師授校職去者鄉縉紳例有
言為之贈弘治己未夏五月郡庠貢士林君宗盛實領
安慶府宿松司教行有日地官主政陳君子居等以予

與宗盛友善肆以贈言見屬予稔知宗盛矣林望于莆
爰自九牧瓊人俊士相繼代作入國朝來若其族伯細
齋先生之磊琨竒特從祖澹軒先生之溫良博雅皆以
文章魁天下隱然一時山斗文印相承科第踵接一門
羣從以經學負時名者無慮十數而尊甫長源先生隱
居授徒工於書畫間作五七言詩不事摹倣亦自成一
家宗盛承奕葉文獻之傳沉靜寡慾有志嚮往甫髫髻
即蘄然見頭角為鄉先輩推重比長聞見博而學益充

文益肆在行輩中莫與相軋予淺且陋過辱不郤往
還論議麗澤漸潤者十餘年得盡見宗盛所謂文說
理精考據審辭既爾雅意亦獨到無沿襲鈎棘之弊每
私試題目盤錯輪囷衆愕眙相視噤莫措一語而宗盛命
筆洒然無窘束態數百人中屢占首選予意其源流遠
而造詣深以舉進士宜若俯拾芒芥然顧亦偃蹇不售
僅以例授今職而晚進崛起者或反先焉詎非命耶惜其
文者咸謂之曰子年未中身而文士之網羅尚在遲之

歲月以圖後舉亦桑榆之收也奚鬱鬱就此為解之者
曰禮有祿仕子二親垂白在堂得升斗之祿為旦夕養
古人所謂不以三公易也就之宜予竊謂不然朝廷以
文取士校職職文教也文之邪正士習關焉校職之設
夫豈徒哉今天下之文弊也極矣高者鍛鍊雕琢恣其
詭險必齜牙詰屈不可句讀然後已下者剽竊掇拾務
為辯博至蔓延草積使讀者厭倦思睡猶不自覺誠得
如宗盛者百餘輩布滿學宮以為斯文領袖刻其弊以

返于醇豈非士習之幸而乃下擬於抱關擊柝諉為祿
仕之地非過歟古之人嗇其施昌其文者多矣宗盛之
應固云弗稱其文不既昌乎況其所施未為全嗇獨不
可以自慰乎世固有梔蠟其文以儼倖一時乃亟棄於
既仕之後如棄筌蹄者君子視之猶蟻蠓也雖擢巍科
都美宦奚取焉故凡膺校職者雖慄焉恐負可也遑恤
乎他宿松亦文邑也予故於宗盛之行為語時文之弊
使之宿松知所取裁云宗盛之族子世隆在實從子希

澄希範四進士皆以文歌鹿鳴而起者使聽予言必有合也試歸以質之


送鄭矩軒之任興山序

國朝以明經取士士由是途進者非明經不取然有遇不遇存焉同治一經也講解之精切其說同敷衍之明暢其文同或一試輒捷或累試而北不知命者往往歸咎於有司至謂通塞由人開終南之捷徑植桃李於私門惑之甚也吾友矩軒鄭先生元德學邃而行潔家庭

之所授受師弟之所傳習甫以治尚書名于時如矩軒者百不一二數偃蹇四十餘年僅以歲貢起又三年乃得一校官迢遞萬餘里入興山謂明經者必在所取何矩軒之不遇耶予未暇極論理數遠稽古人試即矩軒同氣之親及門之士徵之其兄元燦郡庠生元湔儒士與矩軒同時並稱私試聯居首選學者翕然從之而元燦竟齋志以歿元湔落落一布衣且老求如矩軒之小就皆不可得謂非命耶所傳受於其家如正郎于成縣

尹士望于其鄉人子弟如主政黃君俊劉紹功郡守朱
與弼郡倅黃汝為試政洪鳴雍皆成進士子姪重熙子
子重杰洎五六人皆膺鄉薦而矩軒反偃乎其後相去
迥隔謂非命耶知命者不憂吾觀矩軒胸次磊落不肯
少屈其平日正大之氣嚴肅之行要非富貴貧賤所能
移易者校官雖小其責重興山雖僻其民質矩軒之往
也身以為準言以為訓其所陶成必有傑然挺出取科
第躋華要為時名人與中州並者命能限矩軒之身

不能限矩軒之教況高山大川自蜀來者鬱乎九疑之
峭拔上插霄漢浩乎灩澦之奔流一瞬千里皆足以豁
人心目拓其才而廣其量矩軒之所得命又能限之耶
予知矩軒者不告以自學教人之事徒反覆乎命之一
言夫豈不知命不足道哉蓋將以解夫不知矩軒者之
惑俾不例視以尋常校官云耳



方簡肅文集卷二

欽定四庫全書

集部

方簡肅文集卷

三至五

詳校官監察御史_臣曹坦

中書_臣劉源溥覆勘

總校官編修_臣王燕緒

校對官編修_臣沈清藻

謄錄監生_臣高天球

欽定四庫全書

方簡肅文集卷三

明 方良永 撰

序

贈郡貳朱侯秩滿九載序

皇帝元年戊申錢塘朱公士容以儲才試吏部第優等
來同知興化府事既十一年戊午公滿九載將獻績去
陟明有日郡之寮案若衛帥若邑大夫若兩庠文學若

鄉之貴宦咸屬鉅筆贈公以美成績致厚期而屬予言者郡尚義官某等凡若干人也予弗工於言然素辱公愛又重違某等之請誼不可終辭惟士蒞政強勉以善其初久則寢懈以弛者恒情也其不然者才且良者也惟民於官居位則畏其威滿則幸其去者勢也其不然者官之才且良足以感悅之也若吾朱公性嚴而方質敏而精自其韜屈之時涉歷淹貫其於不懈于位以媚乎民者已素計熟定於胸中不腆敝郡辱公來臨雖卧

而理可也而公山澤之癯若不勝衣其始至也民或懼其憊而奪於吏吏或虞其艱於持久而得以售其術公竊念曰治民猶治田也嘉穀是親稂莠為讎者善治田也恣黠吏以稂莠吾民咎將誰執故公以讐其悍明以燭其欺詳慎嚴密以擿發其隱其或放縱為奸格弛公令者公悉置之法不少貸吏於是縮首咋舌莫敢肆其故態以為民緇蠹公乃察土風釐強弱禮其良鋤其慝疏決其凝滯蘇息其凋瘵比及三年苛除嬈解而公之

政行矣公曰未也吏不禍民而已未臻於理也持之六年吏果信公之不可犯惟公指揮民亦寧於幹止果見吏之不足畏兩稅登三木廢而公之政孚矣公曰猶未也民不畏吏而已未底於成也持之九年漸磨久而誠意交事中律度物循軌則民與吏相忘而公之政聲暴於下烝於上矣夫公欲治民必先之治吏明公果斷閱九年如一日非才且良而能之乎昔魯子敬稱龐士元非百里才使得治中別駕乃可展其驥足別駕今郡貳

也驥以儼君子政取其才良也然則公非所謂其人耶
或專指理尺籍之精審者譽公小公者也善最書而異
擢至又公所宜有而不足多者也予故略之而書其大
使公因子言而益堅其素履於異日則愛公頌公者豈
特一興人哉

贈郡守張白齋公致仕序

士君子之出處無常惟其是而已實見得是者蓋寡矣
嗜進者溺於出非也恬退者甘於處亦非也何品藻人

物者恒退是予而司銓衡者亦每注念於若人而獎以
示勸庸非以出之非是者徒為失已而反是猶足以勵
俗故耶於戲此可為世道慨矣若吾郡守白齋張公之
出與處其皆庶幾於實見得是乎抑直為今所獎予而
徒收勵俗之譽乎公少有奇節厭俗學為文辭必上躡
魏晉為五言詩必出入陶謝槩襲陳黃或時出新句奇
崛變化如龍行天蛟出壑雷電晦冥風雨交作人莫之
測公既邁往即無意進取有勸公舉進士輒掉首弗答

至尊翁先生督責之嚴乃不得已為科舉業既成進士
復棄去故於詩若文造詣益專擅名者反後焉由進士
為大理為吾郡馭衆惟寬蒞事惟簡不屑屑取能吏名
亦不求速化公庭晝寂則託興寫懷時與素翁右臺相
酬和間洒茅龍作草書適勁有體石翁內翰殆不能過
公於富貴泊如故在郡六年乞歸者再今年春歸心益
急公牒屢上而巡按藩臬諸公咸慰留不可公乃自上
疏情迫詞懇若不能一日留者其視緋衣象簡曾不若

角巾野服之便震旌五馬曾不若扁舟短棹之適黃堂
畫戟曾不若茅齋几研之幽以淨莆山水雖奇勝曾不
得一遊亦孰若四明之湖光嵐翠為公所有可以朝夕
至之為樂宜公之決有歸志也巡按胡公知公不可留
乃援恬退例為乞轉官致仕上亦嘉公志下吏部議擢
公福建叅政俾得遂所請以去報至公欣然戒行李就
道若公者其始終完名而無玷缺者歟泰之初九曰拔
茅茹以其彙征公之出無以是乎遯之九五曰嘉遯貞

公之處亦何負焉故謂公為出處皆是可也謂為今所
獎予而收有勵俗之譽亦可也何也勇於退者難乎其
人也兩庠諸文學感公之德相率請予文以贈予亦辱
公知者又忍以不文辭故叙公出處之正以壯公行且
以復諸文學之請公琦名君玉字鄞望族也

贈邑侯雷君獻績序

均之任也縣難均之為縣也麗郡多士夫尤難麗郡守
掣其肘志柅弗行多士夫責備者衆煩言易興令脂韋

其間自貽尸素之羞者荏也過為磯激甘速中傷之禍者亢也二者胥失也不尤難哉莆亦難邑也來令予莆者弗荏弗亢下宜民上獲守中信於士大夫耳目所及得二人焉今御史大夫洪公克毅進士雷君孟升是也克毅公炯炯見芒角君沉塞渾涵具有遠識紛乎吾前並成敗利鈍而臆之無錙銖爽故視天下之事若無難為視篆甫閱月守檢齋馮公繼至民方跂踵以須協心之政士大夫旁觀異同以驗成敗君亦未敢必守之知

且信既而心孚道洽如出一軌民所便者君曰可守亦
曰可輒行所不便者君曰不可守亦曰不可輒罷治化
旁流聲名並起莆士大夫莫不欣然異之何其難而易
邪物以類應人以心感心異跡不可強而合夫廉而不
剝平而不苛君是心守亦是心莆士夫亦是心是惟無
感感則必應有相成而無相忌見其易而不見其難君
常俸外無長物自奉菲惡庭絕饋遺之跡孔姑臧賈儉
遊有然者子視吾民敲朴弛浮費節營繕不興鬻子輸

稅者涕泣贖還之召之於上蔡何之於益昌似焉追呼之符不授於徒隸受賕蠹法之吏縮首屏息冠巴東周浙川之遺風矣齋醮樗蒲諸禁則陳甯都之正俗也堤堰斗門之修則曾會稽之興利也使君澤於外而漆其中乃號於人曰我廉平我廉平誰其信之人弗信守士夫可深紿耶政成入報必書上最留必為御史君亦將不難為御史矣君行合甫士夫屬予贈言予故從而敘述之使為縣者知難易存乎其人而不繫於其地也

贈郡博蔡我齋致仕序

士君子提身之大節有二明義利也決去就也然未易能也溺於利者忘義急於就者恒依依不忍去有如我齋其庶乎我齋少承庭訓長從陽明王先生遊有志節不為俗學丁卯舉于鄉試禮部不第意教官可就陽明先生止之曰子以教官為易為乎其顛叩於人一也自是歸卧不出者十年丁丑成進士仍初意疏乞得教授吾郡上官未浹旬日即欲辭去曰陽明先生不我欺也

鄉縉紳懇留之乃與諸生約端趨向篤踐履毋傲以亢
母詔以卑母脂韋突梯以媚世諧俗於是誓節餽遺皆
不受養母之外泊如也於是祭必禋潔鄉飲必慎選擇
弗襲其故也於是司教以憂去者有助諸生之貧者有
助弗量其出入之豐約也甫六閱月士風翕然丕變而
去志復作矣十月望日具冠服辭聖廟即別諸生曰吾
無緣師汝矣諸生咸咨嗟垂涕跽而請曰弟子之遊郡
庠也遠者二十有餘年近者十年七八年又近者三四

年乃今始得吾師何來之暮而去之亟耶我齋曰吾之
去也猶吾之來也陶靖節彭澤八十日而吾倍之矣二
三子何患乎無師諸生知其決不可留乃奔于鄉縉紳
又羣留之不可乃召命畫史肖其像將祠之而乞言以
頌其美予聞有道者重內喪已於物謂之倒置之民我
齋明於義利之辨決於去就之幾如此不謂有道之士
邪予知其去而歸其鄉也不徒放浪江湖自適其閑雲
野鶴之性而已將以鄉先生自處以所得於父師者陶

鎔後進考德問業者不虛其來異日出而仕焉皆將自樹立以無我齋愧則其去猶就也顧不偉哉而諸生戀戀不忍之意猶鬱鬱乎弗紓予辭也拙無能遽解之

贈朱司訓秩滿序

弘治十年丁巳春三月上澣是為郡庠貳教朱先生秩滿之期闔郡士夫暨所與同官交遊者皆感其平素惜其化離各求諸縉紳士之能言者言以贈之於是邑庠貳教吳先生率其寮友謬以序文見屬予故吳先生門

下復於先生有夙好言雖陋誼不容辭乃為之序曰官
不必崇要於職之稱施不必博要於心之誠誠則動物
而職之稱在是強勉修飾以取媚一時者其術易窮及
其久也衆怒羣猜惟恐其去之不亟伊誰感而惜之又
誰追而思之乎今之就教職者恒以其秩之卑而所施
不溥為恨遂並與其官而曠之蓋未之思也一命之士
先後挾所有以教吾郡邑者多矣其善於去者予耳目
所及得二人焉其一曰邑掌教浮梁程先生應韶程之

得代也送者數百人為文凡若干首瀕行之日咸歎惋
咨嗟若去其親戚然是豈可以倖致哉程既去後四年
復得先生先生之始教吾郡也人謂其敏而年少歷履
未諳易視之先生嚴其約束徐而導之乃敦本實以抑
浮靡門生有郭紀者與其弟纓友恭無間先生首表於
儔衆中禮而異之衆自是翕然知所嚮方先生於寮友
處若昆弟善則相成有過則相規正於賢士大夫之家
食者師而友之嚴憚切磋所積益充以肆郡守黃岩王

南郭公嚴毅方正最慎許可先生事之不亢不阿情義
既孚聲聞亦馳遂兩檄先生署平海僊遊學事適僊遊
令缺復以先生署掌邑事蓋知先生之所蓄足以勝之
無疑也若是者謂非一誠足以動物為克稱其職者乎
世之人乃謂人心可以智籠術馭而忠信仁義果無所
用不亦厚誣也哉今日之去人咸感而惜之也固宜去
而思之於後也亦宜然此未足為先生多也先生嘗告
予曰世路嶮巇知止不殆一丘一壑亦足自娛繼自今

我其反我初服陶我天真矣予首肯之而中未之信先生言之至再予竊私謂先生信人也其誠於退也猶其誠於進也斯言尚不妄然猶未敢實以告人也今先生去矣其果不為聲利所奪以無食其言豈非清時一盛事哉然恬退者士君子之美行崇獎恬退者朝廷之懿典戔戔束帛又烏知不起我先生於寬閒寂寞之地耶予不佞好成人之美故於贈言之章樂道之以壯行色先生名鳳別號忍菴世為浙之嘉興人

贈王司訓致仕序

莆所謂文獻之邦也仕莆者匪政之難亦教之難匪政教之為難難乎其人也有其人則政譽四馳聲教旁溢其來也惟恐後其去也惟恐亟而緒戀不忍舍之情往往於臨別見之此人心之公也可倖致哉予家食七年矣歷觀夫司政教足以繫屬人心於不解者得二人焉覺軒雷孟升我齋蔡希淵是也嗣希淵而去者誰耶休齋李子興翠晚王裕夫得無似之乎裕夫峭拔自信恥

為陰回奄媚之行少不好狎長益肆力于學微言奧義
剖折其精口耳誦說者見之其容赧然補邑庠生私試
每列優等藩臬諸公爭致為弟子師裕夫嚴立條約蒞
講席正襟危坐立門下士於兩隅欽肅無譁講罷閉門
不出或夤緣至前乞通關節即厲聲斥之立麾使去其
不可干以私如此故諸公咸愛重之以數奇屢屈場屋
竟以貢入太學銓授吾興司教私喜曰吾不能隨計吏
以角禮闈而得試內庭教名郡吾願足矣始至稜稜然

人莫敢親徐察之心地皦然不獨異不苟同不矯以外飾於是門弟子憚其彊直士大夫服其嚴重郡之長貳亦以其不阿也異視之然卒孤立難合裕夫不恤也齋居無事書聲琅琅如童子時日以詩文自課皆有體裁可諷誦與諸生講解經義必紬繹古聖賢立言之旨聽者洒然莆邃於經者或讓焉夫教人自自學始裕夫好學至老不倦而其為人與為教又足以厭服人心宜其來也人幸之去也人惜之昔晦翁以青天白日磊磊落落

落為君子而歸之梅溪裕夫梅溪後也其亦求無忝厥祖而肖其大也乎顧予言不足為裕夫重而予友黃主靜林與平合謀於衆必予言之屬曰吾師意也予故為序人心之公以為司教者勸教勸政亦勸庸知無因子言而興起者乎裕夫之鄉有憲長伯韶者予同年友也其平生自許也不輕裕夫歸與之遊其必有合也夫

壽陳隱君七十序

陳隱君宗器氏予舊友也性嗜學樂與鉅公碩士遊弱

冠執經李內翰之門與今右臺林見素同筆硯公視之
不敢輕以忽提學未軒黃公重許可恒語人曰陳生每
見必以疑質殆非今學者所居涵江迤北距城無慮二
十餘里向自予病歸被斥歸及今謝事歸輒來造吾廬
不憚再至阿堵炯然言談峭直叱唾奸諛如不欲與同
覆載人以戇視至論其先王父鹽城教諭公先大夫封
員外郎公伯兄少叅東洲公性行遺事鏗鏘炳發能使
人聳聽歆豔今年七十矣正月十日誕辰也戚屬黃瑀

鄭諒如干人將以是日觴隱君為壽二子者豫詣予乞言乃揖而進曰是善士也壯歲抱璞弗售即以所業付震器九成而甘於韞匱先隴與宅第之隙松蓋森鬱不易株計半其手植宅右結屋數楹榜曰萬松以寓志因以自號日游息其中賓至淪茗燃香論往事或雜農談景與意會時於詩發之若懵然無預人世也惟郡大夫當讀法以賓禮延致一出歲饑為鄉邑乞減稅一出旱禱雨致齋一出休養如此是不與造物者爭也間推緒

餘以鎔陶後生綽有型範旁通黃岐堪輿之術亦自名家嘗試輒效弗利厥報波潤于鄉如此少孤奉母蔡宜人能終慕事東洲與仲兄山林野叟如溫國之於伯康也嘗為東洲詣闕白貝錦之冤艱險不避祀事必嚴墓謁以時圮必修敦于倫紀孝于先也如此是壽之基也故年躋七袞皓髮丹顏行無蹇步由是而耄而耄期殆必得也先生雅知隱君昌侈以丈夫澹而無求固養神之道况基之之厚如前所云隱君之壽其有涯耶二子

之言足徵也予復何言雖然二子之乞予言也隱君意也予曷敢辭遂書以與之俾藉手為隱君壽

壽林西坡七十序

深山長谷多難老之民而長生久視全其天年者必鳩居穀食倥侗而顛蒙原壽者數為此言非以其逸且拙耶信斯言也通郡大邑多材藝知能而飛騰宦路者將不得以壽稱耶西坡林君景初莆望族也居郡城東少辟公府以年勞為保昌尉出入瘴鄉恒戒嚴固敢弛備

亦不遑暇逸矣而君也擘畫有方事集而譽起為從事而官長悅之為尉而小民頌之咸曰材且能是豈拙者所能辦哉致事家食餘十年今七十矣視聽步趨猶壯年也髮強半猶髯齒猶固面猶渥丹坐立無歇倚飲醇嘑歲前後不待祝而無哽噎即今驗後踰七而八而九而百歲可前卜也其壽也不與向所言不類耶予意壽有相有基君方面大耳豐頤廣額背厚而胸夷且有眉豪項條固壽相也心地平曠與物無競赴人之急不遺

餘力以幹蠱付伯子顯揚事責之仲子無役役以犯既衰之戒時與劉孺人並坐高堂指揮家政或弄孫而嬉閨門雍肅間速客西坡草堂歡洽竟日不昏眩於聲色之娛固壽基也君之壽不以是耶難者曰原壽之言固為未融子之言亦未必盡然也子之妻祖古廉先生西坡從父兄也眉稜雙起額凸眼凹顴橫屬於耳癯然一翁而年踰八袞何也曰是皆壽相也子以腴瘠求之耶抑予此言固淺壽基之說子得復破之乎曰此則祝壽

者之常談夫人能言之子焉得擅其說且世亦有不培
基而黃其面台其背龍鍾以耄者何曰此殆所謂適然
之數倖也非獨壽也貴與富咸有倖而致者矣君誕辰
在仲冬十又七日予圖所以為壽別無奇語故書此以
為華筵頌禱之助

壽章太安人詩序

稱人之善必本於家庭之教而母教視父兄為尤切稱
人之壽必本其人之有德而女德不越閨壺為難知然

則奚從而攷亦徵諸其子而已矣不觀呂榮公不知有申國夫人不觀歐陽文忠公不知有韓國夫人不觀崔庫部不知有盧夫人昔之名公鉅卿由母教而成者未易悉數吾郡伯馮公壽母章太安人岳池望族也少歸其先主事公閨門有度每誦侯夫人子皆母致之言即以母教自任相主事公宦遊以清白傳郡伯成進士為戶部時迎太安人就養京邸比得郡又奉而南郡伯之言曰吾母意也非徒養也蓋將以便教責即此已可以

峴太安人之賢不誣今觀郡伯下車以來崇儉約絕遊
讌間速客亦不張樂一切浮費裁省無遺其慎如此庸
非太安人有事事循規蹈矩之教如申國乎俸入外無
長物鄉士夫餽遺弗受甘旨之需平鬻于市自奉猶未
遇時也其廉如此庸非太安人有貧乏好消息之教如
崔母乎斷獄既審克矣猶惴惴焉寃在細民之恐不任
情為喜怒其敬于刑如此庸非太安人有求生無憾之
教如韓國乎由郡伯而知太安人之有教由太安人之

有教而知其有賢德德壽之基也今年躋古稀神清體健珠翟霞帔坐高堂以享一郡之養拜子婦若孫於堂下樂融融不可名狀夫豈偶然十一月廿有五日設悅之辰也鄉之士夫與邑庠之僚屬咸議製錦軸以為壽郡伯入啟太安人止之曰士夫之賢而仁者事之友之僚屬之廉者禮之其不然者督戒之汝之職也奈何以我誕日重勞羣公諸執事乎其為我固辭我方以汝父不逮為慊無賀也亦不敢以宴即此又知太安人賢於

人者遠而基夫壽也將未易涯然詩文業已具矣郡博
士蔡君希淵偕其寮莫君必亨李君子揚王君裕夫合
冊於邑侯雷君孟升共得詩若干首而余偕為之序是
舉也樂而思文而質敬而不詔有三善焉其可傳為故
事也夫

方簡肅文集卷三